



Selasa, 23 Januari 2024

Ogen: Josua 1:6-9



Tetapken Ukur



Stress e me salah sada si jadi nandangi kerina jelma. Stress labo salah, sabap pengertin stress e jina e me tanggapenta nandangi tuntutan si ibereken man banta. Si jadi masalah adi la ngasup kita ngaturkenca. Stress e banci rena arah tuntutan keluarga, pendahin, kesehatan, sura-suranta jine, rsd. I bas sukaten si wajar stress e njemba kita guna aktif ndahiken tanggungjawab selaku respon nandangi tuntutan e. Tapi adi la siaturken alu sikap, banci maba kelatihen ras keguluten banta.

Josua pe ngaloken tekanen ntah pe stress i bas ia itangkuhken jadi pengganti Musa, mimpin bangsa Israel. Mbiar dengen la tetap ukurna, sebab secara pribadi nggo iangkana tabiat bangsana, dengen tugas si arus ibabana seh kal beratna, ngerebut tanah Kanaan arah kalak si mbestang, mbisa ras nterem gelah bangsa Israel banci ngianisa. Josua ngeteh si e alu payo, sebab ia pe pernah ikut jadi mata-mata ras 11 kalak si deban ku taneh Kanaan. I tengah keguluten ukurna, seh me pedah Tuhan. Tuhan ngatakenca man bana Tetapken Ukur. Adi bas cakap Indonesia, *kuatkan dan teguhkanlah hatimu*. Tole nari ituriken Tuhan sada rahasia menang arah peperangen bas kegeluhen eme, *ikutkenlah kerina undang-undang siibereken suruh-suruhanku Musa man bandu. Sada bagin pe ola lupaken, maka kuja pa pe kam lawes, jadi bagi sura-surandu (ay.7)*. Radu ras si e Tuhan mereken padan, *ola kam mbiar ola aru atendu, sebab aku Tuhan Dibatandu, tetap ras kam kujapa pe kam lawes*.

Kekelengen Tuhan, adi nggeluh denga kita labo tersilahkan tugas ras tanggungjawab. Tapi ola ban berat ras serana tanggungjawab e erbahanca bera-bera ukurta, lanai terbaba kita. Lit kap Tuhan, tetapkenlah ukurta, isampatiNa kita.

✎ *Ketetetapan Ukur eme bukti kita erkimateken Man Tuhan*